

FRANCISCI PATRICII  
PANARCHIAS  
LIBER DECIMUS SEPTIMUS  
DE CREATIS MENTIBUS.

Nunc ad ea redeamus, quæ sine libri de intellectu in hunc locum reiecimus, de innumeris iis mentibus, quæ essentia sua sunt mentes. Nam de participatis mentibus, ab animis, suos etiam erit agendi locus. Sane si quis diligenter colligat, in Divi Pauli *epistolis*, inveniet nominatos, Angelos, Archangelos, Principatus, Dominationes, Virtutes, Potestates, Thronos. Hos vero omnes Divus Dionysius Noas mentes, et intellectus nominat sæpissime, et his adiicit, Cherubinos, et Seraphinos. Quæ duo nomina, Hebraica sunt, et ex veteri scriptura sumpta. Simul cum aliis, quæ Hebraicis nominibus, eosdem tres hierarchiarum ordines exprimunt, quos Dionysius, explicavit. Sunt autem Hebraica, in primo ordine, seu in prima triade, Cherubin, Seraphin, Chasmatim. In triade secunda, Hagor, Arabim, Tarsitim. In triade vero tertia, Ophanim, Thephsraim, Isim. Dionysius vero Græce scribens, nomina non habuisse, videtur, quibus, Cherubim, et Seraphim exprimeret. Quos neque Paulus nominavit. Reliquos a Paulo est mutuatus, et Thronos, primæ triadis tertios vocavit. Secundam vero dixit esse κυριότητος δυνάμεις, καὶ ἐξουσίας. Quas, Latini et Pauli, et Dionysii interpretes, Dominationes, Virtutes, et Potestates appellaverunt. Tertii vero ordinis Archas Principatus, Archangelos, et Angelos uterque nuncupavit. Quos vero Divus Paulus sparsim, et sine ordine nominavit, christianorum, uti videtur, primus Divus Hierotheus Divi Pauli discipulus a preceptore hausit, et in tres ordines seu triades distinxit, et discipulo suo, Dionysio tradidit. Quas, et ipse sub Hierarchiæ coelestis titulo, Timotheo late declaravit. Cuius equidem doctrinæ sacrosanctæ, operæ precium fuerit summam retulisse, ut cuiusque triadis propria munia cognoscantur. Itaque ex Hebræorum eloquiis Divus Hierotheus, et ex eo Dionysius docuerunt primum ordinem, Seraphinorum, qui calefactores, et incensores Hebraica lingua sonant, et Cherubinatorum, qui sapientiæ fussionem, et Thronorum, qui itidem flammeorum, interpretationem habent; immediate circa Deum versari, et ordines inferiores perenni, ac divina quadam commotione inflammare Dei amore, et reliqua omnia entia, calore illo efficacissimo, primo purgare, deinde illuminare. Postremo tractione quadam, et similitudine ad Deum attrahere. Hæc enim esse, illius ordinis tria precipua munia, ut calore quodam divino, purgent a sordibus, entia inferiora. Deinde cognitionem cuiusque propriam illuminent. Et harum utraque illa perficiant. Omnia namque entia summum bonum, a quo profluxerunt, appetunt sua natura. Et pro viribus, ad ipsum conversa, eo nituntur, ut quam maxime possint ipsi, et iungantur, et eo fruantur. Quam rem Aristoteles quoque, aperte docuit, omnia summum appetere bonum inquires. Hunc entium omnium appetitum, et ad summum bonum nixum, ordo primus maxime adiuvat. Id enim, non solum Dionysii, et Hebreorum autoritas persuadet, sed ratio etiam efficax ostendit. Sunt enim hi, summo bono, et essentia, et potentia, et actione proximi, et eius proxime participes. Itaque boni, et ipsi effectui, nulli entium sunt invidi, et omnibus in bono, bonitate sua cooperari est necesse. Omnis enim bonitas, sui quam maxime possit diffusiva est. Id autem efficiunt, operatione ut diximus triplici. Et cuiusque notitiam (omnia enim sunt mentis participia) illuminando, et appetitiones purgando. Et illuminatas, et purgatas perficiendo, et ad Deum attrahendo. Per has autem easdem actiones, ipsæ quoque primæ Triadis mentes, proxime et iugiter a Deo illustratæ, et divino igne inflammatae, ad ea opera, et iuvantur, et suavi quadam vi impelluntur, et fiunt divinæ providentiæ primariæ ministræ. Quod ipsum munus, et secundus ordo, sed pro natura sua, ut ab opifice est remotior, remissius quam primus, obit. A Deo, et ipse per medium primum, ad perfectionem propriam redactus. Quæ perfectio in eo consistit, ut Dominationes, dominatum quendam in inferiora liberum excerceant, et nulla vi coactæ, ea gratiis suis donent, et illuminent, et purgent, et perficiant, et ad summum bonum ducant. Idemque stabilitate